

BIBLE 316

Unsa ang Biblia?

Unsa ang Biblia? Pinaagi sa Biblia, ang Dios nakigsulti kanimo. Wala lang kini naghisgot sa Dios kundili gikan kini sa Dios. Dili lang kini makapadasig apan gisulat kini uban sa lamdag sa Dios. Mao nga basaha, paminawa, pamalandungi, pagkat-on ug ug ikanabuhi kini. Si Apostol Pedro nagsulat *“Sama sa mga bata nga masuso, pangandoy kamo sa lunsayng gatas nga espirituhanon aron sa inyong pag-inom niini motubo kamo ngadto sa kaluwasan”* 1 Pedro 2:2.

Nganung talagsaon ang Biblia? Ang 66 ka libro sa Biblia nasulat sa tulo ka pinulungan (Hebreohanon, Aramaic ug Griego) pinaagi sa sobra sa kwarenta ka magsusulat sulod sa 1,600 ka katuigan nga may usa ka tema nga gisulat sa sulod sa pipila ka siglo. Ang Bag-ong Tugon gipamatud-an sa 5,000 ka mga manuskrito sa katibuk-an o bahin lang niini. Dungag pa niini, ang pagka-insakto sa Biblia gipamatud-an pinaagi sa mga natumang propesiya, mga bag-ong nadiskobre sa arkeolohiya, matuod nga mga dapit ug pinaagi sa walay kataposang mga kaalam sa Mga Panultihon. Mao nga ang Biblia usa ka mahinundanon ug ma-impluwensya ng libro sa tibook kalibutan. Walay laing libro nga adunay daghang kopya, nga gipang-apod-apod sa kadaghanan, nga gihubad sa daghang pinulungan nga mibag-o ug daghang kinabuhi ug nagpadayon sulod sa ginatos nga katuigan. Ang Biblia adunay hingpit nga gahom sa tanang angay tuohan ug pamaagi sa pagkinabuhi. Ang Biblia nagpabiling labaw sa tanang mga libro sa kalibutan.

Unsa ang mga kinaiya sa Biblia?

Ang Biblia gilamdagan sa Dios. *“Ang tibuk Kasulatan gisulat uban sa lamdag gikan sa Dios”* 2 Timoteo 3:16.

Ang Biblia matuod. Si Jesus nag-ampo, *“Balaana sila diha sa kamatuoran; ang imong pulong kamatuoran”* Juan 17:17.

Ang Biblia insakto gayod hangtod sa labing gagmayng mga detalye. Si Jesus miingon, *“Timan-i kini: samtang anaa pa ang langit ug ang yuta, bisan ang labing gamay nga kudlit o ang labing diyutay nga bahin sa Balaod, dili gayod mahanaw hangtod matuman ang tanan”* Mateo 5:18. Ang pagka-insakto sa mga orihinal nga manuskrito nagpabilin mao nga ang mga pinakaamayong nga mga pulong-sa-pulong nga hubad sa Biblia nagpabiling 99% nga insakto.

Ang Biblia putli. *“Kasaligan gayod ang mga saad sa GINOO, sama sa lunsay nga plata nga giputli sa makapito pinaagi sa kalayo”* Salmo 12:6.

Ang Biblia walay katapusan. *“Malaya ang sagbot ug malarag usab ang bulak apan molungtad hangtod sa hangtod ang pulong sa atong Dios”* Isaias 40:8. Ang Biblia mahinungdanon sukad kaniadto ug hangtod karon.

Ang Biblia gamhanan. Ang Hebreohanon 4:12 nag-ingon, *“Kay ang pulong sa Dios buhi ug maabtik ug mas hait pa kay sa bisan unsang espada nga duhay sulab. Modulot kini hangtod sa kinahiladman sa kalag ug sa espiritu hangtod sa dapit diin nag-abot ang lutahan ug ang kauyokan. Nag-usisa kini sa mga tinguha ug hunahuna sa kasingkasing sa tawo.”*

Unsang mga personal nga kaayohan ang makat-onan sa Biblia?

Ang Biblia mosangkap kanato. *“Ang tibuk Kasulatan gisulat uban sa lamdag gikan sa Dios ug mapuslanon alang sa pagtudlo sa kamatuoran, sa pagbadlong, sa pagsaway ug sa pagtudlo unsaon pagkinabuhi nga matarong. Sa ingon, ang nag-alagad sa Dios masangkap pag-ayo ug maandam sa tanang maayong buhat”* 2 Timoteo 3:16-17.

Ang Biblia nagatabang kanato nga dili makasala. Ang Salmo 119:9,11 nagasulti kanato kon sa unsang paagi kini mahitabo. *“Unsay buhaton sa usa ka batan-on aron magmaputli ang iyang kinabuhi? Pinaagi sa pagtuman sa imong mga sugo”* ug *“Giampingan ko ang imong balaod sulod sa akong kasingkasing aron dili ako makasala kanimo.”*

Ang Biblia nagagiya kanato karon ug nagatambag kanato sa dalan nga angay subayon. *“Ang imong pulong maoy suga nga magtultol kanako ug maoy kahayag sa akong agianan”* Salmo 119:105.

Ang Biblia nagahatag ug kaalam. *“Ang kahulogan sa imong mga pagtulon-an naghatag ug kahayag, ug naghatag ug salabotan sa mga walay kahibalo”* Salmo 119:130. Ang walay kausabang kaalam makita sa libro sa Mga Panultihon diha sa Daang Tugon.

Ang Biblia nagatabang kanato diha sa atong kalisod. Ang Salmo 119:50 nagadasig kanato, *“Bisan sa akong pag-antos nalipay ako kay ang imong saad naghatag man kanakog kinabuhi.”*

Ang Biblia nagahatag ug paglaom. *“Kay ang tanang nahisulat sa Kasulatan gisulat aron pagtudlo kanato aron makabaton kitag paglaom pinaagi sa pailob ug sa kadasig nga gihatag kanato sa Kasulatan,”* Roma 15:4.

Ang Biblia nagahatag ug kalinaw. Ang Salmo 119:165 nagasaad, *“Malinawon kaayo ang nagmahal sa imong balaod, ug walay makapukan kanila.”*

Ang Biblia nagahatag ug kalipay. Ang Jeremias 15:16 naghatag kanato ug pananglitan, *“Gipatalinghogan ko ang tanang gisulti mo kanako. O Yahweh, Dios nga Labing Gamhanan, imo ako, busa ang imong mga pulong nakahatag kanakog kalipay.”*

Unsaon man pagbasa o pagpaminaw sa Biblia? Kinahanglan nga imong sutaon ang gisulti dili lang gikan sa usa ka bersikulo. Pamalandongi ang upat ka katuyoan sa Biblia nga nag-ingon, *“Ang tibuok Kasulatan gisulat uban sa lamdag gikan sa Dios ug mapuslanon alang sa pagtudlo sa kamatuoran, sa pagbadlong, sa pagsaway ug sa pagtudlo unsaon pagkinabuhi nga matarong,”* 2 Timoteo 3:16. Samtang ikaw nagabasa ug nagapaminaw, pamalandongi kining upat ka pangutana. Unsa ang gitudlo niini kanako? Sa unsang paagi kini nagbadlong kanako? Unsaang mga pagbag-o ang angay nakong buhaton? Sa unsang paagi kini nagmatoto kanako aron magmatarong?

Unsay akong buhaton kon wala koy Biblia? Paningkamoti nga ikaw makapalit ug Biblia sa imong pinulongan. Kon ikaw dili makapalit, adunay daghang mga libreng online nga Biblia nga pwede nimong basahon o paminawon. Mahimo usab nga ikaw ug ang imong higala o mga higala mopalit ug Biblia ug mag-ambitanay kamo niini. O mohangyo ka usa sa mga isig ka magtotoo nga basahon ang Biblia sa atubangan sa usa ka grupo aron makapamati kamo niinig maayo. *“Bulahan hinuon sila nga namati sa pulong sa Dios ug nagtuman niini!”* Lukas 11:28.

Unsa ang mga espesyal nga mga bersikulo alang sa mga magtutudlo ug Biblia ug sa mga lider? Paningkamoti nga ikaw mahimong tinun-an ni Jesus nga nagatuman ug nagakinabuhi diha sa Iyang Pulong. *“Busa miingon si Jesus sa mga nanuo kaniya, ‘Kon tumanon ninyo ang akong pagtulon-an, tinuod gayod nga kamo akong mga tinun-an,’* Juan 8:31. Mahinungdanon kaayo nga imong tun-an ang Biblia aron ikaw mahimong takos niini. *“Paningkamoti pag-ayo nga ang Dios mahimuot kanimo ingon nga alagad nga wala ikaulaw ang iyang trabaho ug usa ka alagad nga nagtudlo sa kamatuoran sa hustong paagi”* 2 Timoteo 2:15.

Ngano nga ang Biblia mahinungdanon sa walay katapusan? Si Apostol Juan nagpadayag sa iyang katuyuan sa pagsulat sa Maayong Balita. Ang maong katuyoan maaplikar sa tibook Biblia. *“Ug daghan pang mga milagro nga gibuhat ni Jesus sinaksihan sa iyang mga tinun-an nga wala nasulat niining basahona. Apan gisulat kini aron kamo motuo nga si Jesus mao ang Mesiyas, ang Anak sa Dios, ug pinaagi sa maong pagtuo makabaton kamo ug kinabuhi diha sa iyang ngalan”* Juan 20:30, 31. Sa unsang paagi ikaw motoo kang Jesus ug sa kinabuhing walay katapusan? Hibaloi kini didto sa www.Gospel316.org.

“Malaya ang sagbot ug malarag usab ang bulak apan molungtad hangtod sa hangtod ang pulong sa atong Dios” Isaia 40:8.